

E AÑA AKI ARUBA TA CUMPLI 10 AÑA COMO MIEMBRO DI UNESCO

ORANJESTAD (AAN) -- Dia 20 di October di e aña en curso, Aruba lo cumpli diez aña di ta miembro di UNESCO. Actualmente e oficina di Unesco-Aruba ta den pleno actividad, na encargo di Octavien Spanner y asisti pa Olivia Figaroa, y ademas Dirk-Jan Boerwinkel cu ta yuda part-time tocante Medio Ambiente. Esaki pendiente di e nombramento di un Comision Nacional.

Aña 1997 ta e aña di concientizacion pa cu Unesco, y den e contexto aki, cu caracter exclusivo, DIARIO a entrevista Octavien Spanner y Olivia Figaroa.

Aña di concientizacion ta encera un programa di actividad, y informacion cu por worde resumi di e siguiente manera, segun ambos funcionario ta indica, pa for di nan forma e "Comision Nacional di Unesco-Aruba" (Aruba National Commission for Unesco).

1) Informa e trahadornan publico di departamentonan relaciona cu Unesco, por ehemplo: V.R.O.M., Enseñanza, Telecomunicacion (Informacion y Comunicacion), Asuntonan Social incluyendo Departamento di Hende Muher (pa e proyecto M.O.S.T di Unesco- Educacion pa Adulto), Relacionnan Exterior, Departamento di Cultura, incluyendo Museo. "Esakinan ta mas of menos e departamentonan cu lo forma parti di e Comision Nacional di Unesco. Desde aña pasa caba IDEFRE (deporte) a worde inclui den e programa di Unesco", nan ta splica.

2) Duna informacion na organizacionnan particular ya cu nan ta envolvi den e trabao di base.

3) Informa y envolve maestronan di school y alumnonan.

"Impresion a worde crea cu Unesco ta pa financia proyectonan, loke no ta e caso. E motibo pa paisnan ta miembro ta pasobra Unesco ta yuda cu informacion tocante educacion, riba tereno científico y cultural, pues, difusion di conocimiento".

Den e constitucion di unesco ta bisa "ta den mente di hende guera a bin, pues ta den mente di hende mester bin cu solucion pa paz!"



"Pesey Unesco ta traha riba e terenonan menciona pa logra un mundo mehor pa cada pais, pa cada comunidad y pa cada persona", Octavien Spanner ta comenta. Tambe ta asina cu Unesco ta haci enfasis riba mucha y hobennan.

RESPALDANDO

"PAPIAMENTO": "Durante e Conferencia General di Unesco efectua na aña 1995 a bin pa dilanti cu Aruba ta un di e poco paisnan cu no a desaroya su lenga materno. Unesco ta dispuesto pa yuda Aruba zet op un plan pa introduci Papiamento na Schoolnan", Olivia Figaroa ta comenta.

PROGRAMA PA 1997:

SEMINARIO: Na luna di februari lo worde organiza na Aruba un seminario tocante e funcionamiento di Unesco. Esaki durante e dianan 4, 5 y 6 bao di nomber "Un Perspectiva pa Aruba".

E ta dirigi pa empleadonan di gobierno, organizacionnan particular, y schoolnan.

Pa luna di maart informacion lo worde distribui na schoolnan basico y secundario, pa loke nos ta preparando un documento pa e maestronan. Pa April, Aruba a worde scoge pa Unesco, como sede di un conferencia regional dirigi na funcionarionan di gobiernonan di paisnan di e area cu ta envolvi cu Unesco", Olivia Figaroa ta indica.

PROYECTO DI MEDIO

AMBIENTE: Octavien Spanner ta splica cu tambe Unesco-Aruba lo desaroya un

proyecto di medio ambiente na e schoolnan.

"Ta trata aki di un proyecto di horticultura en cooperacion cu Ministerio di Economia. E motibo ta cu despues di e conferencia cu tuma lugar na october ultimo, di "Unesco Associated Schools Caribbean Sea Project", a worde enfatiza cu mester traha mas riba concientizacion, cuidio y aprecio pa nos medio ambiente".

COLABORACION DI

JAYCEES: Tambe tin deliberacionnan ta andando cu Jaycees si nan por organiza cu un curso pa hobennan. Un programa di liderazgo pa as-

ina capacita nos hubentud pa nan por dirigi nan propio ambiente.

OTRO ASPECTONAN:

"Ademas Unesco lo ta envolvi pa yuda Departamento di Hende Muher pa organiza un grupo di hende muher den barrio y tambe pa pone un banco di data pa haya informacion tocante "gender".

Pa motibo di interes pa Aruba tin su propio museo, lo bay organiza un forum local cu participacion di paisnan cu tin problema singular. A solicita ayudo di Unesco di e region di Caribe pa e workshop aki", Spanner ta splica.

10 AÑA DI MIEMBRESIA: "Aruba ta

preparando pa celebra su di diez aña como miembro di Unesco. Lo invita personanan clave di Unesco cu lo haci e apertura oficial. Tentativamente esey lo sosode dia 20 di october".

INFORMACION: Oficina di Unesco Aruba tin videonan di Unicef riba diferente tema importante cu lo worde presenta na e plantanan di television y medianan di prensa en general, y cu ta trata di temanan manera, e.o: embarazo hubenil y borstvoeding.

AYUDO PA PROYEC-

TONAN: Unesco a financia caba for di aña 1994 e siguiente proyectonan:

Proyecto di musica (compra di instrumentonan di musica pa muchanan); Museo Arqueologico cu e proyecto di pinturanan pre-colombino; Carib- Art, ayudo pa E.P.B., un Consultant a bini pa evalua e funcionamiento di e organizacionnan cultural; un Consultant a bini pa yuda riba tereno social; un Seminario Regional cu a worde organiza na october '96.

Unesco su sistema pa financia proyecto ta hopi burocratico, ya cu ta tuma basta tempo pa haya placa pa un proyecto cu worde acepta.

DIARIO lo amplia e informacion duna durante e entrevista aki.